

四庫全書

集部

欽定四庫全書

集部

御選唐宋詩醇卷四十二

詳校官侍講_臣王燕緒

主事銜_臣徐以坤覆勘

總校官降調編修_臣倉聖脉

校對官編修_臣吳舒帷

膳錄監生_臣薩龍光

欽定四庫全書

御選唐宋詩醇卷四十二

山陰陸游詩一

目錄

寄酬曾學士學宛陵先生體比得書云所寓廣教
僧舍有陸子泉每對之輒奉懷

送曾學士赴行在

新夏感事

留題雲門草堂

度浮橋至南臺

還縣

航海

東陽道中

送七兄赴揚州帥幕

以石芥送劉韶美禮部劉比釀酒勁甚因以為戲

寄張真父舍人

病中簡仲彌性唐克明蘇訓直

晚泊慈姥磯下

夜宿陽山磯將曉大雨北風甚勁俄頃行三百餘里遂抵雁翅浦

送全州趙都曹

病中作

醉中歌

上巳臨川道中

隨意

遊山西村

雨霽出遊書事

上虞逆旅見舊題歲月感懷

題十八學士圖

夜聞松聲有感

十二月一日

宿楓橋

雨中泊趙屯有感

秋風

重陽

沙頭

移船

將離江陵

滄灘

松滋小酌

晚泊松滋渡口

繫舟下牢溪遊三游洞二十八韻

秋風亭拜寇萊公遺像

聞猿

瞿唐行

蹋磧

鄉中每以寒食立夏之間省墳客變適逢此時悽然感懷

風雨中望峽口諸山奇甚戲作短歌

晚晴聞角有感

畏虎

鄰水延福寺早行

大安病酒留半日王守復來招不往送酒解醒因

小飲江月館

曉發金牛

山南行

和高子長叅議道中

次韻張季長題龍洞

太息

閬中作

遊錦屏山謁少陵祠堂

歸次漢中境上

南沮水道中

長木夜行抵金堆市

赴成都泛舟自三泉至益昌謀以明年下三峽

雪晴行益昌道中頗有春意

劔門道中遇微雨

劔門城北回望劔關諸峯青入雲
漢感蜀亡事慨然有賦

綿州魏城縣驛有羅江東詩云
芳草有情皆礙馬好雲無處不遮樓
戲用其韻

東津

東山

綿州錄參廳觀姜楚公畫鷹少陵為作詩者

西郊尋梅

海棠

驛舍見故屏風畫海棠有感

登荔枝樓

凌雲醉歸作

醉中感懷

玻璃江

送客至江上

九月十六日夜夢駐軍河外遣使招降諸城覺而

有作

成都行

初寒

木山

十月十日浮橋成以故事宴客凌雲

觀大散關圖有感

[illegible]

欽定四庫全書

御選唐宋詩醇卷四十二

山陰陸游詩一

三百篇之後自楚騷漢魏六朝以至於唐而詩之變盡
矣變有必極則所就亦以時異故宋人繼唐之後不規
規模擬前人要以自成一家而止然其體製雖殊而波
瀾未嘗二也耳食之流未窺古人門戶於一代大家橫
生訾議而不善學者又徒襲其聲貌亦兩失之矣宋自

南渡以後必以陸游為冠當時稱大家者曰蕭楊范陸
楊萬里則曰尤蕭范陸至劉克莊乃曰放翁學士似杜
甫又曰南渡而下放翁故為一大宗朱子與徐賡載書
放翁詩讀之爽然近代惟見此人為有詩人風致今諸
家詩具在可與游匹者誰也觀游之生平有與杜甫類
者少歷兵間晚棲農畝中間浮沉中外在蜀之日頗多
其感激悲憤忠君愛國之誠一寓於詩酒酣耳熱跌宕
淋漓至於漁舟樵徑茶椀爐熏或雨或晴一草一木莫

不著為咏歌以寄其意此與甫之詩何以異哉詩至萬
首瑕瑜互見評者以為譬之深山大澤包含者多不暇
剪除蕩滌非如守半畝之宮一木一石可屈指計數可
謂知言矣若捐疵類存英華畧纖巧可喜之詞而發其
閎深微妙之指何嘗不與李杜韓白諸家異曲同工可
以配東坡而無愧者哉茲所存者僅逾二十之一直使
天青木響水落石出其有以破拘士之見而守劍南門
戶者亦知所取則也夫

寄酬曾學士學宛陵先生體比得書云所寓廣教
僧舍有陸子泉每對之輒奉懷

庭中下乾鵲門外傳遠書小印紅屈蟠兩端黃蠟塗開
絨展矮紙滑細疑卵膚首言勞良苦後問逮妻孥中間
勉以仕語意極勤渠字如老瘠竹墨淡行疎疎詩如古
鼎篆可愛不可摹快讀醒人意垢癢逢爬梳細讀味益
長矣轂出膏腴行吟坐卧看廢食至日晡想見落筆時
萬象聽指呼亦知題詩處綠井石髮麤公開計有客煎

茶置風爐倘公無客時濯纓亦足娛井名本李疵思人
理豈無居然及賤子媿謝恩意殊幾時得從公舊學鋤
荒蕪古文講聲形誤字辨魯魚時時酌井泉露芽奉瓢
盃不知公許否因風報何如

送曾學士赴行在

二月侍燕觴紅杏寒未坼四月送入都杏子已可摘流
年不貸人俯仰遂成昔事賢要及時感此我心惻欲書
加餐字寄之西飛翮念公為民起我得怨乖隔遙遙跋

前旌去去望車輓亭鄣鬱將暮落日澹陂澤敢忘國士
風涕泣效臧獲敬輸千一慮或取二三策公歸對延英
清問方側席民瘼公所知願言寫肝膈向來酷吏橫至
今有遺蠶織羅士破膽白著民碎魄詔書已屢下宿蠹
或未革期公作醫和湯劑窮絡脉士生恨不用得位忍
辭責併乞謝諸賢努力光竹帛

前篇學宛陵此遂并近工部道義相勗辭意俱古

唐書劉晏傳州縣取富人督漕輓謂之船頭主郵遞

謂之捉驛稅外橫取謂之白著

新夏感事

百花過盡綠陰成
漠漠爐香睡晚晴
病起兼旬踈把酒
山深四月始聞鶯
近傳下詔通言路
已卜餘年見太平
聖主不忘初政美
小儒惟有涕縱橫

風調清蒼立言得
體直是通達治理
非尋常嘲風弄月
者比

王士正曰劉公猷論詩云七律較五律多二字耳其

難什倍譬開硬弩祇到七分若到十分滿古今亦罕
矣予因思唐宋以來為此體者何翅千百人求其十
分滿者唯杜甫李頎李商隱陸游及明之空同滄溟
二李數家耳

文集曾文清公誌銘泰上懲秦士專政之後開言路
獎孤直應詔論事者甚衆

留題雲門草堂

小住初為旬月期二年留滯未應非尋碑野寺雲生屨

送客溪橋雪滿衣
親滌硯池餘墨漬
卧看爐面散煙霏
他年遊宦應無此
早買漁蓑未老歸

度浮橋至南臺

客中多病廢登臨
聞說南臺試一尋
九軌徐行怒濤上
千艘橫繫大江心
寺樓鐘鼓催昏曉
墟落雲煙自古今
白髮未除豪氣在
醉吹橫笛坐榕陰

領聯寫浮橋語頗偉麗
五六雄渾中興象自遠有涵蓋
一切之氣

還縣

霽色清和日已長
綸巾蕭散意差強
飛飛鷗鷺陂塘綠
鬱鬱桑麻風露香
南陌東村初過社
輕裝小隊似還鄉
哦詩忘却登車去
枉是人言作吏忙

三四閑雅可愛畫手有不能寫處

航海

我不如列子神遊御天風
尚應似安石悠然雲海中
卧看十幅蒲鸞鸞若張弓
潮來湧銀山忽復磨青銅
飢鶻

抗船舷大魚舞虛空流落何足道豪氣蕩肺胸歌罷海
動色詩成天改容行矣跨鵬背弭節蓬萊宮

東陽道中

風軟烏帽送輕寒雨點春衫作碎斑小吏知人當著句
先安筆硯對溪山

送七兄赴揚州帥幕

初報邊烽照石頭旋聞胡馬集瓜州諸公誰聽芻蕘策
吾輩空懷畎畝憂急雪打窗心共碎危樓望遠涕俱流

豈知今日淮南路亂絮飛花送客舟

五句承上但覺忠憤填胸不復論其造句之警此子美嫡嗣他人不能到也

以石芥送劉韶美禮部劉比釀酒勁甚因以為戲
古人重改陽城驛吾輩欣聞石芥名風味可人終骨髄
尊前真見魯諸生

草木名物見好賢之意風人微旨可以風世厲俗

元微之陽城驛詩商有陽城驛名同陽道州陽公沒

已久感我淚交流祠曹諱羊祜此驛何不侔我欲避
公諱名為避賢郵

寄張真父舍人

諸公方衮衮無地著斯人萬里夔州守中朝禁省臣孤
帆秋上峽五馬曉班春想見懷明主登臨白髮新

病中簡仲彌性唐克明蘇訓直

移疾還家暫曲肱依然耐久北窗燈心如澤國春歸雁
身是雲堂旦過僧細雨佩壺尋廢寺夕陽下馬弔荒陵

小留莫厭時追遂勝社年來冷欲冰

原註三君皆有歸志故云

晚泊慈姥磯下

山斷峭崖立江空翠靄生
漫多來往客不盡古今情
月碎知流急風高覺笛清
兒曹笑老子不睡待潮平
格力殊健起勢尤為挺拔

夜宿陽山磯將曉大雨北風甚勁俄頃行三百餘里遂抵雁翅浦

五更顛風吹急雨倒海翻江洗殘暑白浪如山潑入船

家人驚怖篙師舞此行十日苦滯留我亦蘆叢厭鳴榔
書生快意輕性命十丈蒲帆百夫舉星馳電驚三百里
坡隴聯翩雜平楚船頭風浪聲愈厲助以長笛撾鼉鼓
豈惟澎湃震山嶽直恐瀕洞連后土起看草木盡南靡
水鳥號鳴集洲渚稽首龍公謝風伯區區未濤煩神許
應知老去負壯心戲遣窮途出豪語

王士禎曰南渡惟陸務觀為大宗七言遜杜韓蘇黃
諸大家正坐沈鬱頓挫少耳要非餘人所及

送全州趙都曹

霜桑無停聲脂車有行色正悲南浦秋又送清湘客啼
飢兒頰紅待養親髮白努力事上官世路日已迫
發端清妙後幅語帶憤激矣

病中作

豫章瀕大江氣候頗不令孟冬風薄人十室八九病外
寒客肺胃下濕攻脚脛俗巫醫不藝嗚呼安託命我始
屏藥囊治疾以清靜幻妄消六塵虛白全一性三日體

遂輕成此不戰勝長年更事多苦語君試聽

醉中歌

吾少貧賤真懼儒貪食嗜味老不除折腰歛版日走趨
歸來聊以醉自娛長鉗巨榼羅盃盃不須漁翁勸三閭
牛尾膏美如凝酥猫頭輪囷欲專車黃雀萬里行頭顱
白鷺作鮓天下無潯陽糖蟹徑尺餘吾州之殫尤嘉蔬
珍盤餽釘百味俱不但項鬻與腹腴悠然一飽自笑愚
顧為口腹勞形軀投効行矣歸園廬莫厭糲飯嘗黃菹

上巳臨川道中

二月六夜春水生陸子初有臨川行溪深橋斷不得渡
城近卧聞吹角聲三月三日天氣新臨川道中愁殺人
纖纖女手桑葉綠漠漠客舍桐花春平生怕路如怕虎
幽居不省遊城府鶴軀苦瘦坐長飢龜息無聲惟默數
如今自憐還自笑歛版低心事年少儒冠未恨終自誤
刀筆最驚非素料五更欹枕一悽然夢裏扁舟水接天
紅葉綠芰梅山下白塢朱樓禹廟邊

隨意

隨意上漁舟，幽尋不預謀。
清溪欣始泛，野寺憶前遊。
豐歲雞豚賤，霜天柿栗稠。
餘生知有幾，且置萬端憂。
起句之妙，正以不著意得之。

遊山西村

莫笑農家臘酒渾，豐年留客足雞豚。
山重水複疑無路，柳暗花明又一村。
蕭鼓追隨春社近，衣冠簡朴古風存。
從今若許閒乘月，拄杖無時夜叩門。

有如彈丸脫手不獨善寫難狀之景

雨霽出遊書事

十日苦雨一日晴拂拭拄杖西村行清溝泠泠流水細
好風習習吹衣輕四鄰蛙聲已閣閣兩岸柳色爭青青
辛夷先開半委地海棠獨立方傾城春工遇物初不擇
亦秀燕麥開蕪菁薺花如雪又爛漫百草紅紫那知名
小魚誰取置道側細柳穿頰危將烹欣然買故寄吾意
草萊無地蘇疲氓

閒閒即目有鳶飛魚躍之意末句一轉便追風人非大
家烏能有此

上虞逆旅見舊題歲月感懷

舴艋為家東復西今朝破曉下前溪青山缺處日初上
孤店開時鶯亂啼倦枕不成千里夢壞牆閒覓十年題
漆園傲吏猶非達物我區區豈足齊

題十八學士圖

隋日昏曠東來傾雷塘風吹草木腥平時但忌黑色兒

不知乃有虬鬚生晉陽龍飛雲涵涵闕洛萬里即日平
東征歸來脫金甲天策開府延豪英琴書閒暇永清晝
簪履光彩明華星高叅伊呂列佐命下者才氣猶崢嶸
但餘一恨到千載高陽繆公來竄名老奸得志國幾喪
李氏誅徙連孤嬰向令亟念履霜戒危亂安得存勾萌
衆賢一佞旤尚爾掩卷涕淚臨風橫

自古知人不易一經指出便為炯戒此詩之有關政治
者筆亦勁直無比

唐書秦王使開立本圖像文學褚亮為之贊題名爵
里號十八學士圖

夜聞松聲有感

清晨放船落星石大風吹颿如箭激回頭已失廬山雲
却上吳城觀落日夜深龍歸擘祠門入木數寸留爪痕
明朝就視心尚慄腥風卷地雷霆奔歸船買酒持自慰
性命生平驚屢戲固知神怒有定時波紋蹙作魚鱗細
如今衰病卧林垌霜覆郊簷月滿庭松聲驚破三更夢

猶作當時風浪聽

原註余丙戌七月自京口移官豫章冒風濤白星子解舟不半日至吳城

山小
龍廟

十二月一日

東風吹斗柄暖律變嚴凝草色迷殘燒溪流帶斷冰
兒書春日勝女翦上元燈莫笑蒲龕睡山翁怯歲增

宿楓橋

七年不到楓橋寺客枕依然半夜鐘風月未湏輕感慨
巴山此去尚千重

所謂一番拈起一番新也

雨中泊趙屯有感

歸燕羈鴻共斷魂
荻花楓葉泊孤村
風吹暗浪重添纜
雨送新寒半掩門
魚市人煙橫慘淡
龍祠蕭鼓鬧黃昏
此身且健無餘恨
行路雖難莫更論

潘問奇曰三四風景颯然五六亦稱

入蜀記大風解船經皖口至趙屯未朝日已行百五十里而風益大乃泊夾中趙屯有戍兵亦小市聚也

夜雨

秋風

秋風吹客檣節物嘆遐方歲事忽云莫吾行殊未央霜
清漢水綠日落楚山蒼此去三巴路無猿亦斷腸

前四句疎宕五六撐拄得起結有餘力逼真盛唐格
律

重陽

照江丹葉一林霜折得黃花更斷腸商略此時須痛飲

細腰宮畔過重陽

王士禎曰偶與友人論宋人絕句若放翁照江丹葉
一林霜舟中一雨掃飛蠅江上荒城猿鳥悲諸篇皆
可直追唐音

入蜀記九日泊埕子磯求菊花於江上人家得數枝
芬馥可愛為之頽然徑醉

沙頭

游子行愈遠沙頭逢暮秋
孫劉鼎足地荆益犬牙州
鼓

角風雲慘江湖日夜浮此生應衮衮高枕看東流
雄渾悲壯直摩浣花之壘

移船

沙際舟街尾相依作四鄰暮年多感慨分路亦酸辛折
竹占行日吹簫賽水神無勞問亭驛久客自知津

將離江陵

莫莫過渡頭旦旦走隄上舟人與闕吏見熟識顏狀癡
頑久不去常恐遭誚讓昨日到檣竿今日聯百丈買薪

備雨雪儲米滿瓶盎明當遂去此障袂先側望即今孟
冬月波濤幸非壯潦收出奇石霧卷見疊嶂地險多崎
嶇峽束少平曠從來樂山水臨老愈跌宕皇天憐其狂
擇地令自放山花白似雪江水綠於釀竹枝本楚些妙
句寄悽愴何當出清詩千古續遺唱

入蜀記九月二十日倒檣竿立艫牀蓋上峽惟用
艫及百丈不復張帆矣百丈以巨竹四破為之大如人
臂予所乘千六百斛船用艫六枝百丈兩車

滄灘

百夫正謹助鳴鑪舟中對面不得語
湏臾人散寂無譁
惟聞百丈轉兩車嘔嘔啞啞車轉急
舟人已在沙際立
露斂蘆村落照紅雨餘漁舍炊煙濕
故鄉回首已千山
上峽初經第一灘少年亦慕宦遊樂
投老方知行路難
松滋小酌

西遊六千里此地最淒涼
騷客久埋骨巴歌猶斷腸
風聲撼雲夢雪意接瀟湘
萬古茫茫恨悠然付一觴

五六脩然意遠兼有沈雄之氣孟浩然云獵響驚雲
夢漁歌激楚詞妙處故應遜此

晚泊松滋渡口

小灘拍拍顧鵝飛深竹蕭蕭杜宇悲
看鏡不堪衰病後
繫船最好夕陽時
生涯落魄惟耽酒
客路蒼茫自咏詩
莫問長安在何許
亂山孤店是松滋

繫舟下牢溪游三游洞二十八韻

舊觀三峽圖常謂非人情意疑天壤間
宜有此崢嶸畫

師定戲耳聊欲窮丹青西游過沔鄂莽莽千里平昨日
到峽州所見始可驚乃知畫非妄却恨筆未精及茲下
牢戍峰嶂畢自呈下入裂坤軸高騫插青冥角勝多列
峙擅美有孤撐或如釜上甑或如坐後屏或如倨而立
或如喜而迎或深如螺房或踈如窗櫺峨巍冠冕古嫺
娜髻鬟傾其間絕出者虎搏蛟龍獐崩崖凜欲墮修梁
架空橫懸瀑瀉無底終古何時盈幽泉莫知處但聞珎
珎鳴怪怪與奇奇萬狀不可名久聞三游洞疾走忘病

嬰竇穴初漆黑，偃僂捫壁行。方虞觸蟄蛇，頗見一點明。
扶接困僮奴，恍然出瓶罌。穹穹厦屋寬，滴乳成微泓。題
名歐與黃，雲蒸蒼蘚平。穿林走驚麕，拂面逢飛鼯。息倦
盤石上，拾樵置茶鐺。長嘯禽谷響，清吟和松聲。辭卑不
堪刻，猶足寄友生。

語奇句老，頗近昌黎視南山。蓋具體而微爾。

秋風亭拜寇萊公遺像

江上秋風宋玉悲，長官手自葺茅茨。人生窮達誰能料，

蠟淚成堆又一時

感慨繫之其風調致佳

王士禎曰詩意以蠟淚成堆為公貴後事按后山叢
談所記則自其微時已然既為宰相乃所謂無地起
樓臺相公也此萊公英雄本色所以不可及

入蜀記巴東謁寇萊公祠登秋風亭下臨江山是日
重陰微雪天氣颼飄復觀亭名使人悵然始有流落
天涯之歎

聞猿

瘦盡腰圍不為詩
良辰流落自成哀
也知客裏偏多感
誰料天涯有許悲
漢塞角殘人不寐
渭城歌罷客將離
故應未抵聞猿恨
況是巫山廟裏時

排宕開闔波瀾無限格調自李商隱得之故自青出於藍

瞿塘行

四月欲盡五月來
峽中水漲何雄哉
浪花高飛暑路雪

灘石怒轉晴天雷千艘萬舸不敢過篙工施師心膽破
人人陰拱待勢衰誰敢輕行犯奇禍一朝時去不自由
山腹空有沙痕留君不見陸子歲暮來夔州嬰塘峽水
平如油

入蜀記入瞿塘峽兩壁對聳上入霄漢其平如削成
仰視天如足練然水已落峽中平如油盎

蹋磧

鬼門關外逢人日蹋磧千家萬家出竹枝慘戚雲不動

劒器聯翩日將夕行人十有八九癭見怪何曾羞顧影
江邊沽酒沙上卧峽口月出風吹醒人生未死信難知
顛顚夔州生鬢絲何日畫船搖桂楫西湖却賦探春詩
鄉中每以寒食立夏之間省墳客夔適逢此時悽

然感懷

手持綠酒酌蒼苔今歲何由匹馬來清淚不隨春雨斷
孤吟欲和暮猿哀皂貂破敝歸心切白髮淒涼老境催
誓墓只思長不出松門日日手親開

風雨中望峽口諸山奇甚戲作短歌

白鹽赤甲天下雄拔地突兀摩蒼穹凜然猛士撫長劍
空有豪健無雍容不令氣象少渟滯常恨天地無全功
今朝忽悟始歎息妙處元在煙雨中太陰殺氣橫慘澹
元化變態含空濛正如奇材遇事見平日乃與常人同
安得朱樓高百尺看此疾雨吹橫風

奇思橫出傑語迭見

晚晴聞角有感

暑雨初收白帝城小荷新竹夕陽明十年塵土青衫色
萬里江山畫角聲零落親朋勞遠夢淒涼鄉社負歸耕
議郎博士多新奏誰致當時魯二生

游嘗與范成大論東坡遙知叔孫子已致魯諸生句謂
為意深語緩此詩結意雖顯亦有不盡之致

畏虎

滑路滑如苔澀路澀若梯更堪都梁下一雪三日泥泥
深尚云可委身餓虎蹊心寒道上跡魄碎茆葉低常恐

不自免一死均豬雞老馬亦甚畏悄悄不敢嘶吾聞虎
雖暴未嘗窺汝棲孤行莫不止取禍非排擠彼讒實有
心平地生溝谿哀哉馬新息惹以成珠犀

得詩人激刺之旨截然徑住彌健彌深

隣水延福寺早行

化蝶方酣枕聞雞又著鞭亂山徐吐日積水遠生煙淹
泊真哀矣登臨獨惘然桃花應笑客無酒到愁邊

原註
酒偶

盡市酤
不可飲

著語之工視四更山吐月殘夜水明樓一警健一細緻
大安病酒留半日王守復來招不往送酒解醒因

小飲江月館

江驛春醒半日留更煩送酒為扶頭柳花漠漠嘉陵岸
別是天涯一段愁

曉發金牛

客枕何時穩忽忽又東裝快晴生馬影新暝坼花房沮
水春流綠嶠山曉色蒼阿瞞狼狽地千古有遺傷

原註
自金

牛以西皆明
皇幸蜀路

山南行

我行山南已三日如繩大路東西出平川沃野望不盡
麥隴青青桑鬱鬱地近函秦氣俗豪鞞鞬蹴鞠分朋曹
苜蓿連雲馬蹄健楊柳夾道車聲高古來歷歷興亡處
舉目山川尚如故將軍堂上冷雲低丞相祠前春日暮
國家四紀失中原師出江淮未易吞會看金鼓從天下
却用關中作本根

和高子長叅議道中

梁州四月晚鶯啼共憶扁舟罨畫谿
莫作世間兒女態
明年萬里駐安西

翩翩有俠氣

次韻張李長題龍洞

我昔謁紫皇翳鳳驂虬龍俯不見塵世浩浩萬里空
謫墮尚遠遊忽到漢始封西望接蜀道北顧連秦中
壯哉形勝區有此蜿蜒宮雷霆自鞶韜環玦亦璵璠
石屋如

建章萬戶交相通來者各有得盡取知無從憑高三嘆
息自古幾英雄老我文字哀揮毫者諸公

慨然遠望落想在耳目之外

太息

原註宿青
山鋪作

太息重太息吾行無終極冰霜迫殘歲鳥獸號落日秋
砧滿孤村枯葉擁破驛白頭鄉萬里墮此虎豹宅道邊
新食人膏血染草棘平生鐵石心忘家思報國即今冒
九死家國兩無益中原久喪亂志士淚橫臆切勿輕書

生上馬能擊賊

閬中作

殘年作客遍天涯下馬長亭便似家
三疊淒涼渭城曲數枝閒澹閬中花
襍賤授官相逢晚理鬢熏衣一笑譁
俱是邯鄲枕中夢墜鞭不用憶京華

遊錦屏山謁少陵祠堂

城中飛閣連危亭處處軒窗臨錦屏
涉江親到錦屏上却望城郭如丹青
虛堂奉祠子杜子眉宇高寒照江水

古來磨滅知幾人此老至今元不死山川寂寞客子迷
草木搖落壯士悲文章垂世自一事忠義凜凜令人思
夜歸沙頭雨如注北風吹船橫半渡亦知此老憤未平
萬竅爭號泄悲怒

傷今懷古懷抱畧同憤馬寤歎如見其人亦以寫其胸
臆耳

歸次漢中境上

雲棧屏山閱月遊馬蹄初喜蹋梁州地連秦雍川原壯

水下荊揚日夜流，遺虜孱孱寧遠略。
孤臣耿耿獨私憂，良時恐作他年恨。
大散關頭又一秋。

才氣慷慨不詭風人

南沮水道中

磴舍臨湍瀨，冒船聚小潭。
山形寒漸瘦，雪意莫方酣。
久客情懷惡，頻來道路諳。
家山空悵望，無夢到江南。

長木夜行抵金堆市

夜行長木村，重霧雜零雨。
溼螢粘野蔓，寒犬吠雲塢。
道

壞交細泉亭廢立遺堵時時過農家燈火照鳴杼嗟予
獨何事無歲得安處即今窮谷中性命寄豹虎三更投
小市買酒慰羈旅高詠東山詩悵望懷往古

赴成都泛舟自三泉至益昌謀以明年下三峽

詩酒清狂二十年又摩病眼看西川心如老驥常千里
身似春蠶已再眠莫雪烏奴停醉帽秋風白帝放歸船
飄零自是關天命錯被人呼作地仙

頷聯自佳近人朱彞尊乃謂此興之體可以偶見撫其

相類之句以為前後稠疊何乃吹毛求疵

王士正曰蜀道廣元縣蜀王弟葭萌所封古苴侯國
城西二里有烏奴山陸游詩莫雪烏奴停醉帽秋風
白帝放歸船是也

雪晴行益昌道中頗有春意

杜陵雁下歲將殘
足馬西遊雪擁關
顓顓敢忘雙闕路
淹遲遍看兩川山
春回柳眼梅鬚裏
愁在鞭絲帽影間
安得黃金成大藥
為人千載駐顏顏

劍門道中遇微雨

衣上征塵雜酒痕，遠遊無處不消魂。
此身合是詩人未，細雨騎驢入劍門。

盧世瀛曰：筆墨之氣脫化殆盡。

劍門城北回望劍關諸峯，青入雲漢，感蜀亡事，慨然有賦。

自昔英雄有屈信，危機變化亦逡巡。
陰平窮寇非難禦，如此江山坐付人。

劉禪庸主譙周庸臣七字中含多少感慨

綿州魏城縣驛有羅江東詩云芳草有情皆礙馬
好雲無處不遮樓戲用其韻

老夫棄興忽西遊遠跨秦吳萬里秋尊酒登臨遍山寺
歌辭散落滿江樓孤城木葉蕭蕭下古驛灘聲瀉瀉流
未許詩人誇此地茂林修竹憶吾州

東津

歲莫涪江水歸壑白沙渺然石犖角蜀天常燠少雪霜

綠樹青林不搖落
闌干詰曲臨官道
煙靄參差望城郭
打魚斫膾修故事
豪竹哀絲奉歡樂
樂莫樂於新相知
美人一笑回春姿
四方本是丈夫事
安用一生無別離
深情老筆視少陵
二作雖未敢旗鼓
中原亦當鴈行同
時諸子豈敢望其項背

東山

今日之集何佳哉
入闌劇飲始此回
登山正可小天下
跨海何用尋蓬萊
青天肯為陸子見
妍日似趣梅花開

有酒如涪綠可愛一醉直欲空千壘
駝酥鵝黃出隴右
熊肪玉白點南來
眼花耳熱不知夜
但見銀燭高花摧
京華故人死
太半歡極往往潛生哀
聊將豪縱壓憂患
鼓吹動地聲如雷

高風跨俗真骨凌霜高作也

綿州錄參廳觀姜楚公畫鷹少陵為作詩者

我來訪古涪之濱
不辭百固冀一真
走馬朝秦海樓館
所膾夜醉魴魚津
越王高樓亦已換
俯仰今古堪悲辛

督郵官舍最卑陋棟撓楹腐知幾春歸然此壁獨亡恙
老槎勁翮完如新向來劫火何自免叱呵守護疑有神
妖狐九尾穴國中共置不問如越秦天時此物合致用
下韞指呼端在人會當原野灑毛血坐令萬里青煙塵
老眼還憂不及見詩成肝膽空輪囷

西郊尋梅

西郊梅花矜絕艷走馬獨來看不厭似羞流落蒙市塵
寧隨荒寒傍茆店翛然自是世外人過去生中差一念

淺顰常鄙桃李學獨立不容鶯蝶覘山礬水仙晚角出
大是春秋吳楚僭餘花豈無好顏色病在一俗無由砭
朱欄玉砌渠有命斷橋流水君何欠嗟余相與頗同調
身客劍南家在剡淒涼萬里歸無日蕭颯二毛衰有漸
尚能作意晚相從爛醉不辭盃瀦灑

因險出奇却不落小家數

海棠

原註范
希元園

誰道名花獨故宮

原註謂故
蜀燕王宮

東城盛麗足爭雄橫陳錦

障闌干外盡吸紅雲酒醺中貪看不辭持夜燭倚狂直
欲擅春風拾遺舊咏悲零落瘦損腰圍擬未工

原註老杜不應

無海棠詩意
其失傳爾

孫勸曰末句妙於翻案如此著意自爾無陳非新

驛舍見故屏風畫海棠有感

厭煩只欲長面壁此心安得頑如石杜門復出歎習氣
止酒還開慙定力成都一月海棠開錦繡裏城迷巷陌
燕宮最盛號花海霸國雄豪有遺迹猩紅鸚綠極天巧

疊夢重跼眩朝日繁華一夢忽吹散閉眼細思猶歷歷
憂樂相尋豈易知故人應記醉中詩夜闌風雨嘉州驛
愁向屏風見折枝

結尾點題含情無限通首俱成波瀾矣夜聞松聲有感
與此同調蓋其作用熟也

登荔枝樓

平羌江水接天流涼入簾櫳已似秋喚作主人元是客
知非吾土強登樓閒憑曲檻常忘去欲下危梯更小留

公事無多厨釀美此身不負負嘉州

原註薛能詩
不負嘉州只

身負

凌雲醉歸作

峨嵋月入平羌水歎息吾行俄至此謫仙一去五百年

至今醉魂呼不起玻璃春滿琉璃鍾

原註玻璃春
眉州酒名

宦情

苦薄酒興濃飲如長鯨渴赴海詩成放筆千觴空十年

看盡人間事更覺麴生偏有味君不見蒲萄一斗換得

西涼州不如將軍告身供一醉

醉中感懷

早歲君王記姓名，即今鷓鴣客邊城。
青山猶是鷓鴣行，舊白髮新從劍外生。
古戍旌旗秋慘澹，高城刁斗夜分明。
壯心未許全消盡，醉聽檀槽出塞聲。

盧世漑曰三四無限感慨

玻璃江

原註眉州共飲亭，益取東坡共飲玻璃江之句，追懷舊遊戲，作以補西川樂府。

玻璃江水千尺深，不如江上離人心。
君行未過青衣縣，妾心先到峨眉陰。
金罇共酌不知曉，月落煙渚天橫參。

車輪無角那得住馬蹄不方何處尋空憑尺素寄幽恨
縱有綠綺誰知音愁來只欲掩屏睡無奈夢斷聞疎砧

原註古樂府安得雙車輪一夜生四角唐人詩云長
安塵土中馬蹄圓重重即馬蹄不方何處認郎蹤

清便宛轉別成風調視范成大作奚營牀上下之別
送客至江上

多事經旬不出城今朝送客此閒行郊原遠帶新晴色
人語中含樂歲聲天際歛雲山盡出江流收漲水初平
故園社友應惆悵五歲無端棄耦耕

如此領聯較之繞郭烟嵐滿山樓閣以相誇耀者獨有
雅人深致

九月十六日夜夢駐軍河外遣使招降諸城覺而
有感

殺氣昏昏橫塞上東並黃河開玉帳晝飛羽檄下列城
夜脫貂裘撫降將將軍櫪上汗血馬猛士腰間虎文韞
階前白刃明如霜門外長戟森相向朔風卷地吹急雪
轉盼玉花深一丈誰言鐵衣冷徹骨感義懷恩如挾纊

腥臊窟穴一洗空
太行北嶽原無恙
更呼斗酒作長歌
要遣天山健兒唱

成都行

倚錦瑟擊玉壺
吳中狂士遊成都
成都海棠十萬株
繁華盛麗天下無
青絲金絡白雪駒
日斜馳遣迎名姝
燕脂褪盡見玉膚
綠鬟半脫嬌不梳
吳綾便面對客書
斜行小草密復疎
墨君秀潤瘦不枯
風枝雨葉筆筆殊
月浸羅襪清夜徂
滿身花影醉索扶
東來此歡墮空虛
坐悲

新霜點鬢鬚易求合浦千斛珠難覓錦江雙鯉魚

一結見意詩體如是

初寒

江路常逢雨山城早得寒蘭凋初解佩菊老尚加餐

原註

嘉陽有崇蘭以
八九月盛開

節物知何負情懷自鮮歡浮生看已熟

不必夢邯鄲

木山

枯楠千載遭風雷披枝折幹吁可哀輪囷無用天所赦

秋水初落浮江來嵌空宛轉若耳鼻峭瘦拔起何崔嵬
珠宮貝闕留不得忽出洲渚知誰推書窻正對雲洞啟
鼓菊初傍幽篁栽是間著汝頗宜稱摩挲朝莫真千回
天公解事雨十日洗盡泥滓滋莓苔一丘一壑吾所許
不須更慕明堂材

十月一日浮橋成以故事宴客凌雲

陰風吹雨白晝昏誰掃雲霧升朝暾三江水縮獻洲渚
九頂秀色欲塞門西山下竹十萬箇江面便可馳車轅

巷無居人亦何怪
釋來看空山村竹枝宛轉秋猿苦
桑落瀲灩春泉渾衆賓共醉忘燭跋一徑却下緣雲根
走沙人語若朝巷爭橋炬火如星繁肩輿睡兀到東郭
空有醉墨留衫痕十年萬事俱變滅點檢自覺惟身存
寒燈夜永照耿耿卧賦長句招羈魂

觀大散關圖有感

上馬擊狂胡下馬草軍書二十抱此志五十猶癯儒大
散陳倉間山川鬱盤紆勁氣鍾義士可與共壯圖坡陀

咸陽城秦漢之故都王氣浮夕靄宮室生春蕪安得從
王師汎掃迎皇輿黃河與函谷四海通舟車士馬發燕
趙布帛來青徐先當營七廟次第畫九衢偏師縛可汗
傾都觀受俘上壽大安宮復如貞觀初丈夫畢此願死
與螻螻殊志大浩無期醉膽空滿軀
忠憤蟠鬱自然形見無意於工而自工

御選唐宋詩醇卷四十二

欽定四庫全書

御選唐宋詩醇卷四十三

山陰陸游詩二

目錄

十月十九日與客飲忽記去年此時自錦屏歸山
南道中小獵今又將去此矣

長門怨

斷碑歎

蜀酒歌

醉後草書歌詩戲作

十二月初一日得梅一枝絕奇戲作長句今年於是四賦此花矣

十二月十一日視築隄

游修覺寺

塞上曲

苦筍

月下作

過大蓬嶺度繩橋至杜秀才山莊

東湖新竹

夏日湖上

同何元立賞荷花追懷鏡湖舊遊

怡齋

龍湫歌

蒸暑思梁州述懷

古意

寓驛舍

題宇文子友所藏薛公鶴

晨至湖上

聽琴

龍眠畫馬

山中得長句戲呈周輔并簡朱縣丞

長歌行

遊三井觀

臨別成都帳飲萬里橋贈譚德稱

丈夫觀

儲福觀

離堆伏龍祠觀孫太古畫英惠王像

登灌口廟東大樓觀岷江雪山

平羌道中望峨眉山慨然有作

次韻何元立都曹贈行

初到榮州

醉中懷眉山舊遊

齋中夜坐有感

晚登橫溪閣

高齋小飲戲作

太液黃鵠歌

夜聞浣花江聲甚壯

謁諸葛丞相廟

醉中長歌

春感

花時遍遊諸家園

題明皇幸蜀圖

春殘

對酒

遊圓覺乾明祥符三院至暮

食齋

幽居晚興

書歎

月下醉題

銅壺閣望月

夜宴即席作

芳華樓夜宴

歲晚

數日寒頓減頗有春意感懷賦短歌

梅花

萬里橋江上習射

出塞曲

偶過浣花感舊遊戲作

樓上醉書

初春出遊

張園海棠

登劔南西川門感懷

眉州作

江樓

訪楊先輩不遇因至石室

感秋

白鶴館夜坐

南津勝因院亭子

書寓舍壁

欽定四庫全書

御選唐宋詩醇卷四十三

山陰陸游詩二

十月十九日與客飲忽記去年此時自錦屏歸山
南道中小獵今又將去此矣

去年縱獵韓壇側玉鞭自探南山雪今年痛飲蜀江邊
金盃却吸我眉月竹枝歌舞新教成淒怨傳得三巴聲
城頭築觀出雲雨峨眉正與闌干平酒酣詩就擲盃去

醉蹋玻璃江上路
懸知幽磎斷橋邊
已有梅花開半樹
長門怨

寒風號有聲
寒日慘無暉
空房不敢恨
但懷歲莫悲
今年選後宮
連娟十蛾眉
早知獲譴速
悔不承恩遲
聲當徹九天
淚當達九泉
死猶復見思
生當長棄捐

忠厚悱惻深於言怨

斷碑歎

原註興元姚節度園以折碑為石筍文猶可識蓋梁蕭懿墓碑簡文為太子時撰書

法通美
可受

二蕭同起南蘭陵正如文叔與伯升至今人悲大蕭死
齋恨不見梁家興崇崇之陵久為谷豈惟羣盜分珠玉
斷碑槎牙棄道邊文字班班猶可讀剝剝苔蘚一悽然
俯仰人間幾變遷世人作碑君勿哂千載園林須石筍
簡峭

蜀酒歌

漢州鵝黃鸞鳳雛不驚不搏德有餘眉州玻瓈天馬駒
出門已無萬里塗病夫少年夢清都曾賜虛皇碧琳腴

文德殿門晨奏書歸局黃封羅百壺十年流落狂不除
遍走人間尋酒壚青絲玉瓶到處酤鵝黃玻瓈一滴無
安得豪士致連車倒瓶不用盃與孟琵琶如雷聒坐隅
不愁渴死老相如

醉後草書歌詩戲作

朱樓矯首隘八荒綠酒一舉累百觴洗我堆阜爭嶸之
胸次寫為淋漓放縱之詞章墨翻初若鬼神怒字瘦忽
作蛟螭僵寶刀出匣揮雪刃大舸破浪馳風檣紙窮擲

筆霹靂鄉音婦女驚走兒童藏往時草檄喻西域颯颯聲

動中書堂

原註余嘗草丞相魯公以下與夏國主書於政事堂

一收朝迹忽十載

西掠三巴窮夜郎山川荒絕風俗異賴有美酒猶能狂
醉中自脫頭上幘綠髮未許侵微霜人生得喪良細事
孰謂老大多悲傷

醉墨淋漓暢然滿志忽移商調淒焉改色矣柴升所謂
浸淫奔放於詞翰之中以遂其放浪蕭散不溺不溜之
槩者取諸此也

十二月初一日得梅一枝絕奇戲作長句今年於是四賦此花矣

高標已壓萬花羣尚恐嬌春習氣存月兔擣霜供換骨
湘娥鼓瑟為招魂孤城小驛初飛雪斷角殘鐘半掩門
盡意端相終有恨夜寒皴玉倩誰溫

梅花詩最為難工中四語頗有逸致

十二月十一日視築隄

江水來自蠻夷中五月六月聲摩空巨魚穹龜牙鬚雄

欲取闌市為龍宮橫隄百丈卧霽虹始誰築此東平公
今年樂哉適歲豐更不相倚勇赴功西山大竹織萬籠
船舸載石來無窮橫陳屹立相疊重置力猶在水廟東
我登高原相其衝一盾可受百箭攻蜿蜒其長高隆隆
截如長城限羗戎安得椽筆記始終挿江石崖堅可礮

游修覺寺

上盡蒼崖百級梯詩囊香椀手親携山從飛鳥行邊出
天向平蕪盡處低花落忽驚春事晚樓高剎覺客魂迷

興闌掃榻禪房卧清夢還應到剡溪

潘問奇曰第三句真登臨妙語

祖應世曰曲江有一水雲際飛之句竟陵評云若入俗手定作一雲水際飛矣此領聯若作鳥從山邊出更有何味

塞上曲

三尺鐵如意一枝玉馬鞭笑把出門去萬里行無前當道何崔嵬云是玉門關方當置屯守征人何時還馬色

如雜花鎧光若流水肅肅不敢譁遙望但塵起日落成
火青煙重塞垣紫回首五湖秋西風開芡菰

蟠竒氣於簡古著鮮華於老健不徒作悲涼語氣體絕
似太白

苦筍

藜藿盤中忽眼明駢頭脫襖白玉嬰極知耿介種性別
苦節乃與生俱生我見魏徵殊媚嫵約束兒童勿多取
人才自古要養成放使干霄戰風雨

周密曰世傳涪翁喜苦筍嘗從斌老乞苦筍詩云南園苦筍味勝肉籀龍稱寃莫採錄煩君更致蒼玉束明月風雨吹成竹嘗賦苦筍云苦而有味如忠諫之可活國放翁又從而獎之云我見魏徵殊媚嫵約束兒童勿多取於是世以諫筍目之殊不知翁嘗自跋云余生長江南里人喜食苦筍試取而嘗之氣苦不可於鼻味苦不可於口故嘗屏之未始為客一設及來黔中黔人各掘苦筍萌於土中才一寸許味如蜜

蔗初春則不食惟熨道人食苦筍四寸餘曰出土尺
餘味猶甘苦相半以此觀之涪翁所食乃取其甘非
貴於苦也

月下作

畏暑不巾襪步月指短筇瘦身髮鬅鬢顧影如孤松徑
幽螢開闔池漲魚噏喁飛泉穿北垣珠玉相撞春東湖
更奇絕百畝銀初鎔但能抱琴往絕恨欠鶴從重露傾
荷盤微風墮芙蓉歡言笑清夜縹緲吹疎鐘空中飛僊

人粲然冰雪容笑我老塵世不記瑤臺逢

清麗寄意處妙無迹相

過大蓬嶺度繩橋至杜秀才山莊

度筇臨千仞梯山躡半空濕雲朝暮雨陰壑古今風亭
觀參差見闌干詰曲通柳空叢篠出松偃翠蘿蒙負籠
銀釵女鉏鋤鶴髮翁何由有餘俸小築此山中

東湖新竹

挿棘編籬謹護持養成寒碧映淪漪清風掠地秋先到

赤日行天午不知解籜時聞聲簌簌放梢初見葉離離
官閒我欲頻來此枕簟仍教到處隨

集中詩類此者頗多往往膾炙人口然領聯不過斷句
工巧作者佳處殊不在此今擇其華淨少累者存之以
備一體其有句無篇者汰之若矜尚字句之巧以為得
放翁家法所謂微之之識砭砭耳

夏日湖上

烏帽筇枝散客愁不妨胥吏雜沙鷗迎風枕簟平欺暑

近水簾櫳探借秋
茶竈遠從林下見
釣筒常向月中收
江湖四十餘年夢
豈信人間有蜀州

同何元立賞荷花追懷鏡湖舊遊

少狂欺酒氣吐虹
一笑未了千觴空
涼堂下簾人似玉
月色泠泠透湘竹
三更畫船穿藕花
花為四壁船為家
不須更踏花底藕
但嗅花香已無酒
花深不見畫船行
天風空吹白紵聲
雙槳歸來弄湖水
往往湖邊人已起
即今憔悴不堪論
賴有何郎共此樽
紅綠踈踈君勿歎

漢嘉去歲無荷省

怡齋

東湖仲夏草樹荒屋古無人亭午涼萱房微呀不見日
筍籜自解時吹香野藤蟠屈入窗罅濕菌扶疎生屋梁
跨溝數椽最幽翳漲水及檻雨敗牆靜涵青蘋舞藻荇
閒立白鷺浮鴛鴦芙渠雖瘦亦瀾漫照眼翠蓋遮紅妝
水紋枕簟欲卷却團團素扇扇嬾復將天風忽送瑤鈴語
喚覺清夢遊瀟湘

龍湫歌

環湫巨木老不花，淵淪千尺龍所家。
爪痕入木欲數寸，觀者心掉不敢譁。
去年大旱綿千里，禾不立苗麥垂死。
林神社鬼無奈何，老龍欠伸徐一起。
隆隆之雷浩浩風，倒卷江水傾虛空。
鱗間出火作飛電，金蛇夜掣層雲中。
明朝父老來賽雨，大巫吹簫小巫舞。
祠門人散月娟娟，龍歸抱珠湫底眠。

須臾慰滿三農望，斂却神功寂若無。
此詩亦有其意。

蒸暑思梁州述懷

宣和之末予始生遭亂不及遊司并從軍梁州亦少慰
土脉深厚泉流清李秋嶺谷浩積雪二月草木初抽萌
夏中高涼最可喜不省舉手驅蟲蟲藏冰一出賣滿市
玉璞堆積寒崢嶸柳陰夜卧千駟馬沙上露宿連營兵
胡笳吹墮漾水月峰燧傳到山南城最思出甲戌秦隴
戈戟徹夜相摩聲兩年劍南走塵土肺熱煩促無時平
荒池昏夜蛙閣閣食案白日蠅營營何時王師自天下

雷雨瀕洞收欒槍老生哀病畏暑濕思卜郭杜開柴荆

古意

紲足飼飢鷹鷹飽意未平伏櫪豈不安老驥終悲鳴士
生固欲達又懼徒富貴素願有未伸五鼎澹無味茅屋
秋雨漏稻陂春水深長歌傾蜀酒舉世不知心

身分極高語亦落落入古

寓驛舍

原註予三至成都皆館於是

閒坊古驛掩朱扉又憇空堂綻客衣九萬里中鯢自化

一千年外鶴仍歸繞庭數竹饒新筍解帶量松長舊園
惟有壁間詩句在暗塵殘墨兩依依

題宇文子友所藏薛公鶴

仙人騏驎絕世稀卵生凡禽似而非宮保妙筆窮化機
縞衣元裳真令威千年華表聊一歸回首幸脫蔡軒譏
喙吞不恨菰米微從吾曹遊安得肥

晨至湖上

園古逢秋好身閒與嬾宜空堂賞踈豁重閣望參差竹

粉有新意松風含古姿
低回慙祿米官事少於詩

聽琴

踈簾曲檻蘋風涼
細腰美人藕絲裳
綠藤水紋穿矮牀
玉指纖纖彈履霜
高林鶯囀日正長
幽澗泉鳴夜未央
哀思不怨和而莊
有齊淑女禮自防
世人但惑青樓倡
琵琶瑩篴雜胡羌
試聽一曲醒汝狂
文姬指法傳中郎
於韓歐蘇黃諸家
外自樹一幟泠泠
清音欲滿人耳視
諸子正未肯作邾
莒

龍眠畫馬

國家一從失西陲年年買馬西南夷瘴鄉所產非權奇
邊頭歲入幾番皮崔嵬瘦骨帶火印離立欲不禁風吹
圉人太僕空列位龍媒汗血來何時李公太平官京師
立仗慣見注渥姿斷絳歲久墨色暗逸氣尚若不可羈
賞竒好古自一癖感事憂國空餘悲嗚呼安得毛骨若
此三千匹銜枚夜度桑乾磧

文集跋韓幹馬大駕南幸將十八年秦兵洮馬不復

可見志士所共嘆也觀此畫使人作關輔河渭之夢
殆欲賈涕矣

山中得長句戲呈周輔并簡朱縣丞

鶴鳴山空無鶴來青霞嶂深天壁開千巖角逐互吞土

一峰拔起矜崔嵬日光微漏潭見底

原註清霞嶂碧玉潭皆霧中佳處

水氣上薄雲成堆幽禽飛鳴報客至奇樹璀璨知誰栽
花藤怪蔓白晝暗犇猿落狖無時衰路窮尚躡一千級
忽見密竹藏樓臺共言神僧昔住此至今光景如天台

搢笏負筮出復沒喜動婦人驚提孩高人何至作狡獪
無乃翫世聊相詆不然學道窮實際詎捨正大宗奇瓌
儒林丈人學擅世餘事尚壓蔡與崔名山未死可再到
此士一失難重陪贊府摘山事如織擺撥領客何奇哉
境幽神愴不可住歸倩玉手傳金杯

原註朱君有侍
兒許為客出

唐書劉建鋒傳高郁教馬殷教民得自摘山收茗算
募高戶置邸閣居茗

長歌行

人生不作安期生，醉入東海騎長鯨。
猶當出作李西平，手梟逆賊清舊京。
金印煌煌未入手，白髮種種來無情。
成都古寺卧秋晚，落日偏傍僧窗明。
豈其馬上破賊手，哦詩長作寒螿鳴。
興來買盡市橋酒，大車磊落堆長鉶。
哀絲豪竹助劇飲，如鉅野受黃河傾。
平時一滴不入口，意氣頓使千人驚。
國讐未報壯士老，匣中寶劍夜有聲。
何當凱還宴將士，三更雪壓飛狐城。

遊三井觀

三井久知名暇日偶一訪棟宇壞欲盡基址尚閎壯畫
牆皆國工煙雲儼天仗旌旄亞戈戟佩玉雜弓韋太古
實傑作筆落九天上吳生名擅世睥睨未肯讓規模遠
有考意象豪不放最奇老癯仙骨立神愈王石恪雖少
怪用筆亦跌宕兩姝澹蛾眉非復火食狀塵埃久侵蝕風
雨無益障好事未易逢寧能久亡恙雍洛劫火餘妙迹
盡凋喪斯遊恐難繼佇立增悄愴

因畫生慨妙得子美家法筆力樸堅亦復相近

臨別成都帳飲萬里橋贈譚德稱

成都城南萬里橋蘆根蘋末風蕭蕭映花碾草鉏車小
駐坡驀澗青驄驕入門翠徑絕窈窕臨水飛觀何岿
判無功名著不朽惟仗詩酒寬亡聊迎霜早已足雄兔
微冷便欲思狐貂喜看縷膾映盤箸恨久斫蟹加橙椒
坐中譚侯天下士龍馬毛骨矜超遥烏犀白紵謫僂樣
但可邂逅不可招今年一戰馘餘子風送六翮凌青霄
美人再拜乞利市醉墨飛落生蛟綃我衰於世百無用

十年不趁含元朝華纓肯傍蕭颯鬢寶帶那束龍鍾腰
祝君好去事明主日望分喜來漁樵遊談引類亦細事
寄酒且解相如消

丈人觀

黃金篆書扁朱門夾道巨竹屯蒼雲崖嶺劃若天地分
千柱耽耽壓其垠纓冠肅謁丈人君廣殿空庭吹寶熏
摩挲畫橋手為數異哉山蒐與土殯物怪盤盤冠立墳
仙人佩玉雜恍怱手整貂冠最不羣欲去不忍恨日曛

道翁采藥晝夜勤松根茯苓獲兼斤人之植立彊骨筋
枸杞羣吠聲狺狺山爐小甑吹幽芬朱顏不飲常自熏
我亦宿誦五千文一念之差隨世紛逝將從翁走如麋
隱書秘訣何由聞

硬語排弄自見妥帖

本集七律自註丈人觀孫太古畫范長生作舉手整
貂蟬像神氣尤奇逸

儲福觀

原註唐王真公
主修真之地

路轉屏風疊雲藏帝子家窮幽行犖确息倦倚槎牙綠
蘚封茶樹清霜折藥花世無勾漏令誰此養丹砂

不少新色亦逼唐調

離堆伏龍祠觀孫太古畫英惠王像

岷山導江書禹貢江流蹴山山為動嗚呼秦守信豪傑
千年遺跡人猶誦決江一支溉數州至今禾黍連雲種
孫翁下筆開生面岌業高冠摩屋棟徙木遺風雖峭刻
取材尚足當世用寥寥後世豈乏人尺寸未施讒已衆

要官無責空賦祿軒蓋傳呼真一閔奇勲偉績曠世無
仁人志士臨風慟我遊故祠九頓首夜遇神君了非夢
披雲激電從天來赤手騎鯨不施鞚

以騷人之才發志士之感獨立蒼茫自詠詩正使生平
蘊結藉此一攄

登灌口廟東大樓觀岷江雪山

我生不識栢梁建章之宮殿安得裁冠侍遊宴又不及
身在榮陽京索間擐甲橫戈夜酣戰胸中迫隘思遠遊

沂江來倚岷山樓千年雪嶺關邊出萬里雲濤坐上浮
禹迹茫茫始江漢䟽鑿功當九州丰丈夫生世要如此
齋志空死能無歎白髮蕭條吹北風手持卮酒酹江中
姓名未死終磊磊要與此江東注海

平羗道中望我眉山慨然有作

白雲如玉城翠嶺出其上異境忽墮前心目久蕩漾別
來二百日突兀喜無恙飛僊遙舉手喚我一稅鞅此行
豈或便屏迹事幽曠何必故山歸更破萬里浪

王士禎曰九盤山臨青衣江遙望大峩秀出天半雲
嵐萬狀積雪晶然中峩如偃僂少峩如拱揖北來諸
山蜿蜒起伏爭趨我下放翁詩白雲如玉城翠嶺出
其上異境忽墮前心目久蕩漾身未到此不知語意之工

次韻何元立都曹贈行

原註元立用陳後
山送蘇公詩韻

嘉榮東西川此別不為遠徘徊凌雲守決去未遽恣登
高望故人煙樹參差見懸知今日夢不隔重城鍵平生
相從意百年有未滿結巢青城雲期子在歲晚

澄澹入古

初到榮州

亂山缺處城樓呀雙旗蕭蕭晚吹笳煙深綠桂臨絕壑
霜落殘瀨鳴寒沙廢臺已無隱士嘯遺宅尚有高人家
鈴齋下榻約僧話松陰枕石放吏衙盃羹最珍慈竹筍
鉅水自養山薑花地爐堆獸熾石炭瓦鼎號蚓煎秋茶
少年遠遊無百里一飢能使行天涯豈惟慣見蓬婆雪
直恐遂泛星河槎故巢肯作兒女戀異境會向鄉閭誇

一盃徑醉幘自墮燈下髮影看髣髴

醉中懷眉山舊遊

勁酒少和氣哀歌無歡情故鄉不敢思登高望錦城錦
城那得去髣髴墓路遙知尊前人指我題詩處我雖
流落夜郎天遇酒能狂似少年想見東郊攜手日海棠

如雪柳飛綿

原註漢嘉街者素牧童謂
子明年春分後當還西州

如瓶瀉水如珠走盤相見酒間揮灑之樂

齋中夜坐有感

荒山為城溪作壕風鼓巨木聲翻濤鴟梟乘屋彈不去
狐狸欺人怒豎毛雨來紅鶴更可惡爭巢一似嬰兒號
城孤屋老草木茂正坐人少此輩豪急呼五百具畚鍤
欲掀窟穴窮腥臊忽然語罷却自笑殘年何至與汝鏖
浣花紅色綠如黛春波灩灩浮輕舸行當繫纜柳陰下
仰聽鶯語傾香醪

晚登黃溪閣

樓鼓聲中日又斜憑高愈覺在天涯空桑客土生秋草

野渡虛舟集晚鴉瘴霧不開連六詔俚歌相答帶三巴
故鄉可望應添淚莫恨雲山萬疊遮

淒其欲絕哀厲彌長被之歌喉可以繞梁三日

高齋小飲戲作

梅花又發鬼門關坐覺春風萬里寬荔子陰中時縱酒
竹枝聲裏強追歡丁年漢使殊方老子夜吳歌昨夢殘

白帝夜郎俱不惡兩公補處得憑欄

原註予五年
間白夔客榮

太液黃鵠歌

有引

漢始元元年春二月黃鵠下建章宮太液池中公卿
上壽賜諸侯王列侯宗室金錢予夜讀漢書追作歌

一首

建章宮裏春風寒太液水生池面寬中人馳奏黃鵠下
龍旗豹尾臨池看芹香藻暖鵠得意左右從官呼萬歲
須臾傳詔宴公卿歡聲如雷動天地時平宮省遊樂多
黃鵠刷羽涵恩波小臣珥筆龍墀下願繼前朝天馬歌
託興深遠承靈威兮障外國猶是夜度桑乾之意

夜聞浣花江聲甚壯

浣花之東當笮橋犇牛齧橋橋為搖分洪初疑兩蛟舞
觸石散作千珠跳壯聲每挾雷雨橫巨勢潛借鼉鼉驕
夢回聞之坐太息鐵衣何日東征遼銜枚度磧沙颯颯
槩槩斷隴風蕭蕭不然投檄徑歸去短篷卧聽錢塘潮

謁諸葛丞相廟

原註彌牟
八陣原上

漢終四百天所命老賊方持太阿柄區區梁益豈足支
不忍安坐觀異姓遺民亦知王室在閔位那干天統正

公雖已沒有神靈猶假賊手誅鍾鄧前年我過沔陽祠
再拜奠俎哀淚迸潔齋請作送迎詩精忠大義神其聽
能道孔明心事辭意警絕善於色舉

醉中長歌

闌干斗柄搖天東人間一夜回春風注桃染柳歲相似
惟我衰顏非昔紅可憐逢春不自感更欲使氣驚兒童
煙郊射雉錦臆碎水亭供膾金盤空歸穿南市萬人看
流星突過連錢驄高樓作歌醉自寫墨光燭焰交長虹

人生未死貴適意萬里作客原非窮故人夜直金鑾殿
偃卧獨聽宮門鐘

春感

少時狂走西復東銀鞍駿馬馳如風眼看春去不復惜
只道歲月來無窮初遊漢中亦未覺一飲尚可傾千鍾
叉魚狼藉漾水濁獵虎蹴蹋南山空射堋命中萬人看
毬門對植雙旗紅華堂却來弄筆硯新詩醉草誇坐中
劍關南山纔幾日壯氣摧縮成衰翁雪霜蕭颯已滿鬢

蛟龍鬱屈空蟠胸隣園杏花忽爛漫推枕彊起隨遊蜂
遶看百匝幾嘆息吹紅洗綠行忽忽莫年逢春尚有幾
常恐春去尋無踪青銅三百尚可辦且判爛醉酤邯鄲
花時遍遊諸家園

宣華無樹著啼鶯惟有摩訶春水生故老能言當日事
直將宮錦襄宮城

於海棠寓荒淫之警獨有深味

題明皇幸蜀圖

天寶政事何披猖使典相國胡奴王弄權楊李不足怪
阿瞞手自裂紀綱八姨富貴尚有理何至詔書褒五郎
原註天寶末下詔
雪張易之兄弟 盧龍賊騎已沟沟丹鳳神語猶琅琅

人知大勢危累卵天稔奇旤如崩牆臺省諸公獨耐事
歌詠功德卑虞唐一朝殺氣橫天末匹馬西奔幾不脫
向來謠子知幾人賊前稱臣草間活劍南萬里望秦天
行殿春寒聞杜鵑老臣九齡不可作魚蠹蛛絲金鑑篇
筆墨老橫有如高牙大纛堂堂正正摧堅而折銳一結

尤得立言之旨

春殘

石鏡山前送落暉
春殘回首倍依依
時平壯士無功老
鄉遠征人有夢歸
苜蓿苗侵官道合
蕪菁花入麥畦稀
倦遊自笑摧頽甚
誰記飛鷹醉打圍

盧世灌曰項聯有髀肉復生之慨

對酒

閒愁如飛雪入酒
卽消融好花如故人
一笑盃自空流

鶯有情亦念我柳邊盡日啼春風長安不到十四載酒
徒往往成衰翁九環寶帶光照地不如留君雙頰紅

遊圓覺乾明祥符三院至暮

成都再見春事殘雖名閒官實不閒門前車馬鬧如市
案上文檄高於山有時投鐔輒徑出略似齊客偷秦關
日斜僕夫已整駕顧景欲駐愁嘲訕豈知今朝有此樂
放浪一笑開衰顏抽身黃塵烏帽底得意翠木清泉間
褰裳危磴窮犖确洗耳古澗聽淙潺豈惟頓覺宇宙廣

政爾一散腰脚頑似聞青城縹緲處待我歸綴仙官班
俊鷹解條即萬里豈比倦翼方知還

食齋

小著鹽醯助滋味微加薑桂發精神風爐歛鉢窮家活
妙訣何曾肯授人

小有風致

幽居晚興

借鉏斲藥喜微香汲井澆花趁晚涼胸次何曾橫一物

尊前尚欲笑十場錦江秋雨芙蓉老笠澤春風杜若芳
歸去自佳留亦樂夢中何處是吾鄉

行雲流水之趣眼前語頗能道出

書歎

三代藏寶器世守參河圖埋湮則已矣可使列市區文
章有廢興蓋與治亂符慶歷嘉祐間和氣扇大鑪數公
實主盟渾灝配典謨開闢始歐王苗裔逮曾蘇大駕初
渡江中原皆避胡吾猶及故老清夜陪坐隅論文有脉

終千古著不誣俯仰四十年綠髮霜蓬枯孤生尊所聞
秉節不敢渝久幽士固有速售理則無世方亂珉玉吾
其老江湖

文章與時隆汙自古而然後生小子循規矩而改錯豈
知老成之有淵源耶太白歎大雅久不作少陵云文章
千古事高情遠識可以並讀

文集答邢司戶書近時頗有不利場屋者退而組織
古語剝裂奇字大書深刻以眩世俗讀之使人面熱

此等果可言文章乎如唐韓氏柳氏吾宋歐氏王氏
蘇氏以文章擅天下者徒以在場屋時苦心耗力凡
陳言淺說之可病者已知厭棄如都市之玉工珉玉
雜治積日既久望而識之矣一旦取荆山之璞以為
黃琮蒼璧萬乘之寶珉豈可復欺耶凡今不利場屋
而名古之文者往往多未嘗識珉者也又安知玉哉
月下醉題

黃鵠飛鳴未免飢此身自笑欲何之閉門種菜英雄老

彈鋏思魚富貴遲生擬入山隨李廣死當穿塚近要離
一樽強醉南樓月感慨長吟恐過悲

盧世灌曰三四自是壯語

銅壺閣望月

銅壺閣上看明月身在千尋白銀闕十年肺渴今夕平
皓然胸次堆冰雪恨無仙掌出雲表更取墜露和玉屑
夜闌三嘆下危梯明日人間火雲熱

夜宴即席作

宣華輦路牧牛羊摩訶龍池草茫茫宮殿犁盡餘繚牆
南風遠吹禾黍香草間白骨橫秋霜何由喚起醺一觴
癡人走死聲利場我獨感此惜流光蘋花開時風榭涼
美人縹緲如鸞翔堯年舜日樂未央非子之故為誰狂
芳華樓夜宴

射虎將軍老不侯尚能豪縱醉江樓笙歌雜沓娛清夜
風露高寒接素秋少日壯心輕玉塞暮年幽夢墮滄洲
人間清絕沅湘路常許靈均作許愁

歲晚

歲晚城隅車馬稀
偷閒聊得掩荆扉
征蓬滿野風霜苦
多稼連雲雁鷺肥
報國有心空自信
結茅無地竟安歸
浣花道上人誰識
華表千年老令威

領聯真風人語
歎惋無盡妙有含蓄

數日寒頓減
頗有春意感懷賦短歌

微陰寒不力
破臘春暗動
林梢報梅白
水際聞鳥哢
羈鴻漸整翮
一一勞自送
應憐飛蓬客
猶作浣花夢
平生

江淮間裘馬事豪縱，豈知老畏死。齋鉢受蔬供，忍饒每自笑。小飲未敢痛，何以慰寂寥。卧聽壓春甕。

梅花

冰崖雪谷木未芽，造物破荒開此花。神全形枯近有道，意莊色正知無衰。高堅政要飽憂患，放葉何遽愁荒遐。移根上苑亦過計，竹籬茅屋真吾家。平生自嫌亦自許，妙處可識不可誇。金尊翠杓未免俗，篝火為試江南茶。另開生面全是寓言。

萬里橋江上習射

坡隴如濤東北傾胡牀看射及春晴風和漸減雕弓力
野迥遙聞羽箭聲天上欖槍端可落草間狐兔不須驚
丈夫未死誰能料一筭他年下百城

出塞曲

佩刀一刺山為開壯士大呼城為摧三軍甲馬不知數
但見動地銀山來長戈逐虎祁連北馬前曳來血丹臆
却回射雁鳴綠江箭飛雁起連雲黑清泉茂草下程時

野帳牛酒爭淋漓不學京都貴公子唾壺麈尾事兒嬉
偶過浣花感舊遊戲作

憶昔初為錦城客醉騎駿馬桃花色玉人携手上江樓
一笑鈎簾賞微雪寶釵換酒忽徑去三日樓中香未滅
市人不識呼酒仙異事驚傳一城說至今西壁餘小草
過眼年光如電掣正月錦江春水生花枝缺處小舟橫
閒倚胡牀吹玉笛東風十里斷腸聲

樓上醉書

丈夫不虛生世間本意破敵收河山豈知蹭蹬不稱意
八年梁益凋朱顏三更撫枕忽大叫夢中奪得松亭關
中原機會嗟屢失明日茵席留餘潛益州官樓酒如海
我來解旗論日買酒酣博簞為歡娛信手梟盧喝成采
牛背爛爛電目光狂殺自謂元非狂故都九廟臣敢忘
祖宗神靈在帝旁

縱筆直書却有沈鬱頓挫之妙范成大贈游云高興餘
飛動孤忠有照臨非虛語也

初春出游

春風初來滿刀州江水照人如潑油
犢車芳草南陌頭家家傾貲事遨遊
萬里橋西繫黃驄為君一登散花樓
半年長齋廢觥籌興來忽典千金裘
小桃婀娜弄芳柔紅蘭茁芽滿春洲
壚邊女兒不見愁鬪草纔罷還藏鉤
可憐世人自拘囚益中乾坤舞蜉蝣
百年苦短去日遒問君安用萬戶侯

張園海棠

洛陽春信久不通
姚魏開落胡塵中
揚州千葉昔曾見
已歎造化無餘功
西來始見海棠盛
成都第一推燕宮
池臺掃除凡木盡
天地眩轉花光紅
慶雲墮空不飛去
時有絳雪縈微風
蜂蝶成團出無路
我亦狂走迷西東
此園低樹猶三丈
錦繡却在青天上
不須更著刀尺裁
乞與齊奴開步障

不著凡語為海棠
生色從來咏海棠
者多矣以此為最

登劍南西川門感懷

自古高樓傷客情更堪萬里望吳京
故人不見莫雲合客子欲歸春水生
瘴癘連年須藥石退藏無地著柴荆
諸公勉畫平戎策投老深思看太平

盧世漣曰此首極似杜陵讀者自辨之

眉州作

扁舟久不泛蠶津常恐黃塵解污人
爛醉破除千日懣

原註予不至眉山三年矣

狂吟判斷四州春

原註此行自成都歷永康唐安至眉山

汀

洲漸歎蘋花老風露初嘗荔子新
便欲騎鯨東海去勝

遊未忍別我岷

江樓

急雨洗殘瘴江邊閒倚樓日依平野沒水帶斷槎流擣
紙荒村晚呼牛古巷秋腐儒憂國意此際入搔頭
隨意詠懷不覺近杜其由來深矣

訪楊先輩不遇因至石室

訪客客已去追涼成獨行衣冠嚴漢殿草木拱秦城古
甃蒼苔滑空庭落日明出門還懍懍列屋打碑聲

原註
瑞東

即石
經堂

感秋

西風繁杵擣征衣客子關情正此時萬事從初聊復爾
百年彊半欲何之畫堂蟋蟀怨清夜金井梧桐辭故枝
一枕淒涼眠不得呼燈起作感秋詩

王士正曰玉階蟋蟀開清夜四語小說載此為蜀中
某驛卒女詩放翁見之納以為妾為夫人所逐又有
卜算子詞不合畫春山依舊留愁住云云按劔南集

此詩乃放翁在蜀時所作本七律玉階作畫堂開作
怨後人稍竄易數字輒傳會或收入閨秀詩可笑也

白鶴館夜坐

竹聲風雨交松聲波濤翻我坐白鶴館燈清無晤言廓
然心境寂一洗吏卒喧袖手哦新詩清寒愧雄渾屈宋
死千載誰能起九原中間李與杜獨招湘水魂自此競
摹寫幾人望其藩蘭苔看翡翠煙雨啼青猿豈知雲海
中九萬擊鵬鷖更開燈欲死此意與誰論

此與書數一篇見此老識力亦後學良則所以為南渡之冠

南津勝因院亭子

南江平無風如鏡新拂拭漁舟不點破潏潏千頃碧闌干西北角雲散山爭出坡陀競南走翠入窗戶窄江山不世情作意娛此客豈無尊中酒豪飲非宿昔明當還成都塵土埋馬迹後巖在眼中飛去無羽翼

原註後巖在鳳凰山

後七八里山水尤奇絕

書寓舍壁

天與癡頑不解愁
未埋病骨且閒遊
山於拄杖橫時看
路到芒屨破處休
初擬燒丹住南嶽
却因學劍客西州
秋風巾褐添蕭爽
又作臨邛十日留



御選唐宋詩醇卷四十三